




Naš Securitas

BROJ 1
NOVEMBAR 2012



Poštovane kolege,

u cilju unaprjeđenja informisanosti svih uposlenika u agencijama i Securitasu BH, odlučili smo početi sa štampom i distribucijom glasnika Naš Securitas. Naš Securitas će izlaziti svakog mjeseca i bit će vam dostavljen na vašu kućnu adresu.

U Našem Securitasu su sadržane informacije o preduzeću koje vam mogu biti korisne. Nadalje, tu su vijesti o značajnijim događajima i aktivnostima čiji je cilj promovisanje ugleda preduzeća i unapređenje poslovanja. Trudit ćemo se da vam prenesemo informacije za koje smatramo da će doprinijeti vašem boljem razumijevanju sistema upravljanja i komunikacije u Securitasu BH, povezivanju sa drugim kolegama širom Bosne i Hercegovine i poboljšanju kvalitete vašega rada.

Svaka vaša sugestija i mišljenje o tome šta biste voljeli čitati u Našem, odnosno vašem Securitasu je i više nego dobrodošla. Ako vam je dostupna elektronska pošta, pišite nam na nas.securitas@securitas.ba, a ako nije, slobodno možete dostaviti informacije koje želite podijeliti sa ostalim kolegama u pisanoj formi na adresu: Bačići 15, 71 000 Sarajevo, sa naznakom: za Naš Securitas.

**Lijep pozdrav do idućeg broja,
Odjel za marketing i komunikacije**

Pismo direktora



Mirsad Ćatić,
generalni direktor Securitasa BH

Poštovani,

Veliko mi je zadovoljstvo i čast što vam se mogu obratiti na ovaj način. Ovaj mali bilten je mogao biti napravljen i prije nekoliko godina i na isti način distribuisan, ali nismo imali sve ostalo što je po mom shvatanju poslovanja trebalo imati, a to je: stabilnost preduzeća na tržištu, jasnu pozicioniranost, prepoznatljivost našeg brenda, likvidnost, dobru organizaciju, jasne procedure u svim segmentima, testiranje i edukaciju koja kreće zajedno sa izdavanjem ovog biltena. Takođe, priveli smo kraju reorganizaciju i spajanje agencija i većina uposlenih je sada u jednoj agenciji - agenciji Securitas. Danas imamo sve što je potrebno da budemo dobro preduzeće, i to u vremenu teškom za poslovanje. To znam ja, to znaju naši klijenti koji nam plaćaju uslugu, iako su i oni u teškoj situaciji (ali ipak trebaju osigurati svoju imovinu), a to znate i vi (jer razmjenjujete iskustva sa kolegama iz naših agencija i sa kolegama iz iste branše) i sigurno osjećate kako situacija za poslovanje nije nimalo jednostavna. Zato sam u narednom periodu i dao prioritet na dodatnu edukaciju i kontrolu kvaliteta kako bi naša usluga bila još bolja i kako bismo stekli dodatnu prednost na tržištu.

Iskoristio bih priliku da vam svima zahvalim na trudu koji ulažete i da vam zaželim sve najbolje.

Securitas u svijetu

Securitas pruža zaštitu najrazličitijim klijentima širom svijeta. Glavne usluge koje pruža su: fizička zaštita, mobilna intervencija i monitoring, te konsultantske i detektivske usluge. Poseban naglasak u komunikaciji sa klijentima se stavlja na kombiniranu i specijaliziranu zaštitu, što znači - prilagođenu potrebama korisnika. Securitas u svijetu upošljava preko 300.000 ljudi u 51 zemlji svijeta. U 2011. godini ukupna prodaja je iznosila 14.172.000.000 KM! Securitas posluje u Sjevernoj Americi, Evropi, Latinskoj Americi, Bliskom istoku, Aziji i Africi. Unutarnja organizacija se sastoji od sljedećih segmenata: Zaštitarske usluge Sjeverna Amerika, Zaštitarske usluge Evropa, Zaštitarske usluge Ibero-Amerika, Mobilne patrole i monitoringa. Unutar toga postoje podorganizacijske strukture koje upravljaju segmentima u zavisnosti od vrste klijenata, kao što su: avijacija, velika preduzeća, pomorstvo itd. Dionice Securitasa se nalaze na Štokholmskoj berzi.



Securitas u Bosni i Hercegovini

Securitas BH d.o.o. je najveća grupacija agencija za privatnu zaštitu lica i imovine u Bosni i Hercegovini. Imamo preko 2.000 klijenata i 1.800 zaposlenih koji čuvaju preko 3.000 objekata. Securitas BH d.o.o. objedinjuje rad nekoliko agencija za zaštitu: Securitas d.o.o. Mostar, AWG Gama Sigurnost d.o.o. Sarajevo i AWG d.o.o. iz Banje Luke.

Za sve vrste klijenata pružamo kombiniranu zaštitu koja obuhvata: fizičku i tehničku zaštitu, dojavno-operativni centar, intervencijske timove, transport novca i vrijednosti, zaštitu lica i sigurnosni inženjering.

Centrala i zajedničke službe Securitasa BH d.o.o. za sve agencije se nalazi u Sarajevu na adresi Bačići 15.

Trebamo biti ponosni na mjesto koje zasluženno imamo na tržištu!

Izvod iz Vrijednosti i načela

Od marta ove godine Securitas International je objavio zbir propisa kojima se regulišu Vrijednosti i načela kojih se moraju pridržavati svi uposlenici Securitasa u cijelom svijetu.

Načela su prvobitno napisana na engleskom jeziku, a potom prevedena na 35 jezika i distribuisana u sve zemlje u kojima Securitas ima svoja preduzeća za zaštitu.

Svih 300.000 hiljada uposlenika moraju znati koja su to načela i vrijednosti i moraju ih se pridržavati. Periodično se vrše provjere poznavanja elemenata Vrijednosti i načela, bilo putem elektronskih upitnika na međunarodnom nivou bilo kontrolama na lokalnom nivou.

U svakom broju Našeg Securitasa donosimo po dio iz originalnih Vrijednosti i načela Securitas Internationala. Odvojite nekoliko minuta, pročitajte ih postanite dio velike svjetske porodice koja brine o svojim radnim kolegama.

U ovom broju donosimo vam dio koji se odnosi na osnovne vrijednosti.





Svaki zaštitar i uposlenik Securitasa BH je dužan poznavati „Vrijednosti i načela Securitas Internationala“, koji se primjenjuju na globalnom nivou. Odredbe „Vrijednosti i načela Securitas Internationala“ su:

Opšti principi

Pridržavanje zakona, održavanje visokih moralnih standarda i čuvanje zajedničkih vrijednosti imaju istaknutu ulogu u cjelokupnom funkcionisanju preduzeća Securitas i predstavljaju temelj na kome naši klijenti, uposlenici, dioničari i drugi ulagači zasnivaju povjerenje u preduzeće Securitas. Ovi principi takođe igraju važnu ulogu u održavanju utemeljenih vrijednosti Securitasova brenda i podsticanju dugoročne održivosti i rasta našeg poslovanja širom svijeta.

Kodeks vrijednosti i načela preduzeća Securitas („Kodeks“) predstavlja jednu od ključnih smjernica poslovanja preduzeća Securitas i ističe osnovne principe koje Securitas od svih svojih zaposlenika i poslovnih partnera očekuje da poštuju u svakom trenutku.

Kodeks je u bliskoj vezi sa vrijednostima vodiljama Securitasa: poštenjem, spremnošću i uslužnošću.

Razumijevanje Kodeksa i pridržavanje njegovih odredbi odgovornost je preduzeća Securitas kao kompanije i svih zaposlenih i članova Uprave u preduzeću Securitas. Securitas takođe očekuje od svojih poslovnih partnera da se pridržavaju principa Kodeksa na više različitih nivoa. Kod svih zaposlenih i poslovnih partnera se podstiče i od njih se očekuje da prijave sve slučajeve nepoštivanja istog, uz garanciju da niko ko sa dobrim namjerama prijavi ovakve slučajeve neće pretrpjeti nikakvu odmazdu ili negativne posljedice svojih postupaka. Kodeks predstavlja minimalni standard, ali ni na koji način ne isključuje niti zamjenjuje stavke kolektivnih ugovora. Iako Kodeks pruža smjernice za veliki broj pitanja koja se odnose na prihvatljive standarde integriteta i prikladnog poslovnog ponašanja, bilo bi nemoguće njime obuhvatiti sve situacije do kojih može doći u svakodnevnom radu u okviru poslovanja preduzeća Securitas širom svijeta. Zato Kodeks ne može zamijeniti pojedinačnu odgovornost svakog zaposlenog ili poslovnog partnera u donošenju osnovane procjene u skladu sa duhom i ciljem Kodeksa, kao i sa konkretnim tekstom Kodeksa.

Vrijednosti i načela Securitas Internationala

Securitas podržava principe Univerzalne deklaracije o ljudskim pravima Ujedinjenih nacija, Deklaracije o osnovnim principima i pravima na radu Međunarodne organizacije rada i smjernica OECD-a (Organizacije za ekonomsku saradnju i razvoj) za multinacionalne kompanije, i nastojimo se držati tih principa u sopstvenim smjernicama, procedurama i svakodnevnoj praksi. Rad preduzeća Securitas zasniva se na tri osnovne vrijednosti: poštenju, spremnosti i uslužnosti.

Poštenje

Securitas insistira na poštenom pristupu poslovanju. Uspjeh svakog preduzeća u velikoj mjeri zavisi od poštenja i integriteta njegovih zaposlenih. Preduzeće Securitas nepokolebljivo je u svojim zahtjevima za integritetom i istinitošću. Integritet takođe podrazumijeva pravo na slobodno izražavanje ličnog mišljenja i prijavljivanje nepravilnosti i drugih važnih informacija bez rizika od odmazde.

Spremnost

Securitas insistira na profesionalnom pristupu poslovanju. Uposlenik u preduzeću Securitas mora nastojati da u svakom trenutku bude pažljiv i u stanju da sagleda, čuje i procijeni kako bi preduzeo razumne mjere i zaštitio prostorije i imovinu klijenata, kao i vrijednosti i načela koje Securitas predstavlja.

Uslužnost

Securitas teži tome da živote ljudi učini sigurnijim. Uposlenik u preduzeću Securitas uvijek mora biti spreman pružiti pomoć u kontekstu određenog zadatka. Moramo biti spremni podržati kolege, klijente i sve ostale kojima je pomoć potrebna. Model upravljanja preduzeća Securitas koristi se za širenje poslovne kulture preduzeća i stvaranje zajedničke platforme, a primarno ga simbolizuje usmjerenost na tri osnovne vrijednosti preduzeća Securitas.



Direktor regije Sarajevo

Valdin Jažić



Valdin Jažić,
direktor regije Sarajevo

Valdin Jažić rođen je 1976. godine u Sarajevu. Na Univerzitetu u Sarajevu stekao je zvanje profesora sporta i tjelesnog odgoja. 2000. godine je počeo raditi za Alarm West, gdje je zajedno sa osnivačem Mirsadom Čatićem postavio standarde za današnju uspješnu agenciju Securitas d.o.o. Mostar. Već pet godina kasnije postaje direktor te agencije. Sve do danas je na višim rukovodećim pozicijama u agencijama i grupaciji Securitas BH.

Za Naš Securitas Valdin Jažić je rekao:

Poštovane kolege,

počastvovan sam prilikom da za prvi broj izdanja Naš Securitas uputim nekoliko prigodnih rečenica.

Radeći kao zaštitar na različitim objektima i sa različitim klijentima, bio sam u prilici da osjetim probleme sa kojima se svakodnevno susrećete. Zato se svi zajedno u menadžmentu preduzeća trudimo da naši uposlenici dobiju priznanje koje zasluže svojim zahtjevnim radom na objektima.

Ispunjavanjem ugovornih obaveza, poštivanjem propisanih procedura rada na objektu, uz vašu budnost, ljubaznost i susretljivost, dokazujemo da naši klijenti mogu računati na nas kao pouzdanog partnera kojeg mogu preporučiti i drugim potencijalnim klijentima. Time postajemo agencija za zaštitu na koju klijenti računaju zbog kvalitetnog kadra.

Vjerujem da ste svjesni odgovornosti koju nosite, jer naš kvalitet ste upravo vi - naši zaštitari na terenu sa kojim se klijenti svakodnevno susreću. I trebate znati da svako nepotpuno ili nekvalitetno izvršavanje ugovorene usluge za klijenta može rezultirati gubitkom ugovora, a samim tim i prestankom vašeg angažmana.

Upućujem vam srdačan pozdrav i želim vam sve najbolje na privatnom i poslovnom planu.

Posjeta generalnog direktora Securitasa Bosni i Hercegovini



5. septembra 2012. godine Securitas BH posjetili su Alf Goransson, predsjednik Uprave i generalni direktor Securitasa AB, Pawel Rafalski, direktor Sektora Securitas Istočna Evropa, i Marcus Andersson, direktor Sektora finansija Securitasa Istočna Evropa.

Alf Goransson kao predsjednik Uprave Securitasa AB i njegov generalni direktor prvi je čovjek u operacijama Securitasa za cijeli svijet. Goransson je rođen 1957. godine u Švedskoj, a završio je studij ekonomije i menadžmenta. Pored svojih obaveza u Securitasu, obavlja i dužnost predsjedavajućeg Uprave Loomisa AB (Securitasovog preduzeća za transport novca), te direktora Hexpola AB i Axel Johnsona Inc., SAD. Ranije je radio za NCC, Svedala Industri, Švedske željeznice. Kao i drugi članovi Uprave Securitasa, posjeduje dionice Securitasa AB. Posjeta upravnog vrha Securitasa Istočnoj Evropi obuhvatila je, pored Bosne i Hercegovine, i posjetu Securitasovoj agenciji za zaštitu u Hrvatskoj – Zvonimir Security, te Securitasu u Rumuniji.

Članovi Upravnog odbora Securitasa BH predstavili su vlastiti rad svojim pretpostavljenima. Securitas BH je već od samog ulaska u Securitas Group bio prepoznatljiv po svojoj sveobuhvatnoj ponudi usluga po principu „Sve na jednom mjestu“, što nije karakteristično za mnoge Securitase na državnim nivoima koji su primarno orijentirani ka ponudi fizičke zaštite. Bosanskohercegovački Securitas može osigurati i fizičku i tehničku zaštitu, kao i sigurnosni inženjering, transport novca, usluge dojavno-operativnog centra i interventnih timova za svakog klijenta. Rukovodstvo Securitasa BH je ponosno predstavilo svoje nove proizvode: vozilo za snimanje na terenu, SOS Securitas i Rent Alarm, koji se i na internacionalnom nivou smatraju uspješnim sigurnosnim rješenjima. Posebnost Securitasa BH je to što nije isključiv u smislu klijenata i ne nudi svoje usluge samo onima koji imaju potrebu za specijaliziranim i kompleksnim sistemima zaštite, kao što su velika preduzeća i banke, već je spreman pružiti usluge zaštite i malim preduzećima, obrtima, kućanstvima, fizičkim licima...

Iako su ove informacije poznata činjenica za Upravu Securitas Groupa, posebnu težinu su nosile prezentacije u kojima su predstavnici Uprave Securitasa BH predstavili svoje rezultate, koji su izuzetni u odnosu na stanje na tržištu i veličinu Securitasa BH u komparaciji sa Securitas Groupom i ostalim agencijama za zaštitu u BiH. Također, predstavljanje na licu mjesta u centrali Securitasa BH, koja se nalazi u Sarajevu, dalo je detaljnu sliku menadžerima koji su smješteni u Štokholmu. Gospodin Goransson je komentarisao predstavljanje riječima: „Miris je naše najposebnije čulo i po mirisima se pamti i godinama kasnije prepoznaje mjesto i situacija“, imajući na umu utisak koji je bosanskohercegovački Securitas ostavio na njega. Objasnio je to time da organizaciona struktura, posvećeno rukovodstvo, predanost inovaciji i kvaliteti „odiše“ iz prezentacija o Securitasu BH te da je izuzetno zadovoljan ukupnim radom Securitasa u BiH.



SECURITAS LIGA u malom fudbalu

Securitas BH je u saradnji sa stručnim timom Black Wolfa početkom maja 2012. godine pokrenuo projekat Securitas lige u malom fudbalu. Osnovni cilj projekta je druženje uposlenika i razvijanje međuljudskih odnosa. Prvo kolo Securitas lige održano je 27. maja na Vlašiću, gdje su se odigrale utakmice između 12 timova. Timovi su kreirani prema branchevima, a podijeljeni su u dvije grupe: A i B (po šest timova). Utakmice se igraju po principu 4+1, sa dužinom trajanja od 20 minuta po jednom poluvremenu. Do sada su odigrana tri kola, i to na lokacijama Vlašić i Blagaj. Organizatori imaju u planu odigravanje pet kola nakon čega će se igrati play off za pobjednika lige. U narednim brojevima donosimo rezultate nastavka takmičenja.





Rezultati odigranih kola i trenutna tabela

Grupa A

1. kolo

| | |
|-----------------------------|-----|
| BO S1 - CIT | 6:2 |
| BO S3 - BO Herceg. 1 | 3:3 |
| BO Travnik/Bihać - BO Tuzla | 2:2 |

2. kolo

| | |
|---------------------------------|-----|
| BO Tuzla - CIT | 1:3 |
| BO Travnik/Bihać - BO Herceg. 1 | 5:1 |
| BO S1 - BO S3 | 3:3 |

3. kolo

| | |
|--------------------------|-----|
| BO S3 - CIT | 3:4 |
| BO Travnik/Bihać - BO S1 | 1:3 |
| BO Tuzla - BO Herceg. 1 | 4:1 |

Grupa B

1. kolo

| | |
|-------------------------|-----|
| BO S2 - Administracija | 6:2 |
| BO S4 - BO Herceg. 2 | 5:1 |
| BO Zenica - BO RS/Brčko | 1:2 |

2. kolo

| | |
|------------------------------|------|
| BO RS/Brčko - Administracija | 10:6 |
| BO Zenica - BO Herceg. 2 | 2:1 |
| BO S2 - BO S4 | 0:7 |

3. kolo

| | |
|----------------------------|-----|
| BO S4 - Administracija | 7:3 |
| BO Zenica - BO S2 | 0:0 |
| BO RS/Brčko - BO Herceg. 2 | 0:1 |

Trenutna tabela Grupe A

| Ekipa | Broj utakmica | Pobjede | Neriješeno | Porazi | Go-razlika | Bodovi |
|------------------|---------------|---------|------------|--------|------------|--------|
| BO S1 | 3 | 2 | 1 | 0 | 12:6 | 7 |
| CIT | 3 | 2 | 0 | 1 | 9:10 | 6 |
| BO Travnik/Bihać | 3 | 1 | 1 | 1 | 8:6 | 4 |
| BO Tuzla | 3 | 1 | 1 | 1 | 7:6 | 4 |
| BO S3 | 3 | 0 | 2 | 1 | 9:10 | 2 |
| BO Herceg. 1 | 3 | 0 | 1 | 2 | 5:12 | 1 |

Trenutna tabela Grupe B

| Ekipa | Broj utakmica | Pobjede | Neriješeno | Porazi | Go-razlika | Bodovi |
|----------------|---------------|---------|------------|--------|------------|--------|
| BO S4 | 3 | 3 | 0 | 0 | 19:4 | 9 |
| BO RS/Brčko | 3 | 2 | 0 | 1 | 12:86 | 6 |
| BO Zenica | 3 | 1 | 1 | 1 | 3:34 | 4 |
| BO S2 | 3 | 1 | 1 | 1 | 6:94 | 4 |
| BO Herceg. 2 | 3 | 1 | 0 | 2 | 3:7 | 3 |
| Administracija | 3 | 0 | 0 | 3 | 11:23 | 0 |

Securitas Fun Run

Veliko nam je zadovoljstvo da smo učestvovali u promociji zdravog života i dana bez automobila u okviru Sarajevskog polumaratona. Poseban dio ove manifestacije bila je Securitasova trka – Securitas Fun Run, duga 4 km.

Nakon 5 godina od prve organizacije Polumaratona u Sarajevu, bilo je veliko interesovanje i za 4K takmičenje, čiji je cilj bio razvoj dodatnog interesovanja rekreativaca za trčanje i zdrav način života. Skoro 50 uposlenika agencija Securitasa je učestvovalo u trci Securitas Fun Run. Od 390 takmičara koji su se prijavili za trku Securitas Fun Run 4K pobijedili su: Sana Pašagić u ženskoj konkurenciji i Karlo Sušilović u muškoj. Drugoplasirani u ovoj trci su Adela Čomor i Anel Hiseni, dok su trećeplasirani Azra Hany Bajdel i Bakir Halilović. Najmlađi učesnik je bila četverogodišnja Žad Demolin, a najstariji – 73 godine stari Emir Šehić. Securitas je svim učesnicima podijelio poklone, a najmlađi i najstariji su posebno nagrađeni.

Na Polumaratonu je ukupno učestvovalo skoro 800 takmičara iz više od 20 zemalja. Đuro Kodžo (1 sat, 09 min.) i Biljana Cvijanović (1 sat, 17 min.) iz BiH pobjednici su šestog Sarajevskog polumaratona. "Prezadovoljni smo odzivom takmičara na obje trke, i to nam daje dodatnu motivaciju da idemo dalje ka našem konačnom cilju – da Sarajevo postane prepoznatljiva evropska metropola za cestovne trke i da imamo pet hiljada učesnika", istakao je Erol Mujanović, zahvalivši svim sponzorima koji kontinuirano podržavaju organizaciju Sarajevskog polumaratona.



Fond Solidarnosti

Securitas BH od početka iduće godine pokreće Fond solidarnosti. Cilj ovog Fonda je pružanja materijalne pomoći članovima Fonda solidarnosti. Svi uposleni koji se izjasne da žele biti članovi fonda imat će obavezu mjesečne uplate sredstava, ali u isto vrijeme i pravo da se prijave za prijem pomoći.

Branch menadžeri zajedno sa predstavnicima kadrovske službe preuzet će obavezu da uposlene detaljno upoznaju sa Procedurom koja reguliše Fond solidarnosti, te da prikupljaju sredstva, pomažu radu komisije koja će dodjeljivati sredstva na osnovu zahtjeva uposlenika.



Šansa za uposlene

Stipendija **Melker Schorling**

Poštovane kolege,

ulaskom u veliku porodicu Securitas International otvaraju se nove mogućnosti za poslovanje naših agencija, ali i za same uposlenike. Jedna od takvih šansi je i stipendija za sve uposlene Securitasa u cijelom svijetu pod nazivom Melker Schörling Scholarship. Riječ je o stipendiji koja podrazumijeva finansiranje kratkoročne razmjene uposlenika Securitasa u neke druge zemlje gdje Securitas ima svoje poslovnice. Dakle, svaki uposlenik koji govori strani jezik, a poželjan je engleski jezik, može se prijaviti i dobiti mogućnost da otputuje u neku od zemalja gdje posluje Securitas, u njoj provede određeno vrijeme i razmijeni svoja iskustva u radu u sektoru sigurnosti. Formular i više podataka možete naći na našoj web-stranici: www.securitas.ba/stipendija.

Prijava ne garantuje odobrenje stipendije.

Počinjemo sa odabirom od decembra 2012!

Uprava Securitasa je odlučila da svakog mjeseca četvero uposlenih bude nagrađeno priznanjem **RADNIK MJESECA**. Nagrada će podrazumijevati: diplomu, jednokratni dodatak na platu za tekući mjesec i upisivanje nagrade u lični dosije radnika, što će mu omogućiti bolju poziciju u budućnosti nakon uvođenja kategorizacije uposlenih.

Uposlenike će za radnika mjeseca predlagati njihovi branch menadžeri, a posebno formirana komisija će odlučivati ko su najbolji radnici na području aree. Nadređeni će se prilikom odabira kandidata voditi kvalitetom urađenog posla, njegovom lojalnošću, solidarnošću, timskim radom, inovativnošću i motivacijom.

Uposlenici koji rade kraće od šest mjeseci ili je protiv njih pokrenut disciplinski postupak ne mogu biti kandidati za nagradu Radnik mjeseca.



Svi uposlenici mogu biti dobitnici priznanja "Radnik mjeseca", kako uposlenici u agencijama u vlasništvu Securitasa BH tako i uposlenici podugovarača-AWG d.o.o. Društva za obezbjeđenje lica i imovine Banjaluka.



Radnik mjeseca Admir Rizvić

Hitro i oprezno djelovanje



Admir Rizvić,
radnik mjeseca

Pored odabira radnika mjeseca, Uprava Securitasa BH zadržava pravo nagrađivanja uposlenika koji pokažu izuzetno zalaganje na svom radnom mjestu.

Dana 21.10.2012. godine u 17:35 h u jednom od objekata velikog klijenta Securitasa - Preventu, na lokaciji Topuzovo polje, izbio je požar, koji je aktivirao vatrodjavni alarm. Zaštitar Admir Rizvić, koji je obavljao poslove fizičke zaštite na tom objektu, je odmah reagirao, ušao u objekat, uočio mjesto požara i pristupio gašenju prema procedurama. Svojim hitrim, ali u isto vrijeme opreznim djelovanjem spasio je imovinu klijenta izuzetne vrijednosti. Kolega Rizvić je uposlen kao zaštitar još od 2007. godine kada je počeo raditi u Agenciji za zaštitu B.I.G.A. Sarajevo. Nakon ulaska Agencije B.I.G.A. u grupaciju, Admir Rizvić je prešao u agenciju Alarm West, koja danas nosi naziv Securitas. Bio je angažiran i na fizičkoj zaštiti Doma zdravlja Visoko. Prema riječima svog pretpostavljenog: „Zaštitar Rizvić je tokom proteklih godina izrastao u dobrog zaštitara koji poslove i radne zadatke obavlja profesionalno i savjesno na zavidnom nivou!” Stoga je Uprava Securitasa BH odlučila da kolegi uruči priznanje i novčanu nagradu. Preduzeću i kolegi je i klijent uručio posebnu zahvalnicu.

Pozdravljamo kolegu Rizvića i želimo mu puno uspjeha u daljem radu!



IMPRESUM:

Tekstovi i urednik: Daniela Gogić, **Fotografije:** Daniela Gogić, Muamer Mujkić i arhiv Securitasa AB, **Lektura i korektura:** Damir Muharemović, **Dizajn:** Sanel Palislamović, **Štampa:** Suton d.o.o., **Izdavač:** Securitas BH, **Tiraž:** 1.800